



龜巢詞補遺

武進謝應芳

如夢令

陳彥真居昆陵鶴溪之陰中年以來斥斷家事
黃冠羽衣倏然物外予聞而嘉之故作此以贈

滿眼青山如畫說甚玉堂金馬頭戴綠皮冠穿箇布袍
冬夏都罷都罷心上了無牽掛

一帶鶴溪環遶溪上石田多少春雨駕龍畊種得玉芝
瑶草堪笑堪笑海水幾翻乾了

蘿屋不經風破苔徑不教塵污漁鼓洞仙歌童子唱來
還和閑坐閑坐窗下白雲飛過

松菜酒香春瓮更有麻姑相送日日瀉流霞添我胸中
鉛汞珍重珍重浮世本來如夢

江城子

賀蕭聖張克讓戊申正月九日初度生孫是日立春節也

阿翁初度宴重闈正熙熙醉如泥春到階庭玉樹長孫
枝坐客持杯停壽曲都聽取鳳雛啼 明年蓬矢兩弧
垂對佳期試周期看取干戈俎豆弄金龜彭祖春秋應
八百孫似祖與年齊

南樓令

老友劉景儀去秋以星術之書推測年命謂今春當即世乃預葬具且自為埋銘及賦詩自挽既而失去行囊之資用鬱鬱然然康強無恙予故作此曲戲而付之

生死隔年期劉伶老似癡動教人負鉤相隨驚得青蚨
飛去了無酒飲却攢眉 春暖典春衣還堪醉似泥趁
清明雨後遊嬉楊柳池塘桃杏塢春水漫夕陽遲

高陽臺

題張德機荆南精舍圖

陽羨溪山輞川煙雨隱然畫裏觀詩芳草王孫別來幾
度春歸最憐屋壁藏蝌蚪化劫灰飛入昆池好堦墀書
帶青青竹雪霏霏 相逢共約歸期待玄龜出雒朱鳳
鳴岐正壑幽尋正須重製荷衣斬蛟射虎都休問有白
鷗堪與忘機近西枝移我龜巢隣爾漁機

一剪梅

立春日感興

東風吹醒老梅枝南也芳菲北也芳菲月明夜半五更
時笛也爭吹角也爭吹 青松澗底獨離奇寒也誰知
暖也誰知老夫聊為一獻欸梅也題詩松也題詩

沁園春

與正集三首二

寄崑山友人
并自述

泉石膏肓塵土驅馳還家鬢霜想吟邊茗盃清風習習
醉中琴操流水洋洋口不雌黃眼無青白鳧鶴從教自
短長閒居好有溪蓬釣具林館書床 春風賓主壺觴
坐慈竹軒中挹翠香儘劇談千古神游混沌高歌一曲
興在滄浪老我牛衣懷人馬帳誰似彭宣到後堂都傳
語問魚書久絕兔穎何忙

又前調一首

憶昔移家著處偷生廿有餘遭幾番驚怕青霹靂滿懷
愁悶蒼海茫洋故步全非新知悞喜襪線初無尺寸長
龍鍾後方馬歸伏櫪龜作楮床 年來飲不盈觴也不
愛花枝錦綉香與山僧野老交情淡淡盃飯清話

浪浪燕子重來桃花應笑四壁空空一草堂償詩債有
隔年未了連日猶忙

前調

寄詢
講主

每憶岩房端石玄雲宣毫紫霜想筆端風雨不時蕭颯
胸中淵海無底潢洋楓落寒江草生春夢欲說天機話
甚長知音者有真能入室好與連床 梅花窗下茶觴
小團月烹來竇乳香覽吳淞夜月珠光瑩潔崑山霽雪
瓊液淋浪不出門庭那知世態金玉家家要滿堂長安
市似遺腥蠅聚采密蜂忙

江城子

前作五月十二日壽萬拙齋詞意有未盡
乃再歌別紙寫去為拙齋寬舒逸樂之勸

去年今日訪龐公也忽忽去城中回首青山帶雨汗顏
同茅屋破來風轉急愁殺我浣花翁今年一笑喜相
逢海榴紅照簾櫳休把閑愁牽擊廢歌鐘請看灰飛千
里草金滿塢總成空

西江月

與鄧景文先生
干借姜堯章詞

十載不歌金縷秋娘已負青年朝雲飛過畫樓前無復
為人留戀默坐鷓鴣聲裏尋思白石詞仙好將花樣
更流傳重覩春風人面

蝶戀花

贈萬彥述
鸞弦重譜

一曲求凰彈越調紅葉慙慙鳳已成雙了織翠輕裾雲

縹緲多情佩有宜男草十月小春天氣好春到南枝

梅蕊含微笑珍重畫眉人起早風流不讓張京兆

半軒詞

清風八詠樓

贈送朱彥祥有引

楮園王行

沈隱侯守東陽建八詠樓其地又有雙溪之勝
故曰明月雙溪水清風八詠樓朱公子彥祥家
本吳喜遊歷時寓東洋一住餘十載今年六月
還訪親舊秋復南轅約來春攜其德耀驥子歸
復故宇臨岐無以寓情因尋林鍾商曲有名清
風八詠樓者南宋詞林所製也調既適時譜又
合東陽故事填一闕以餞云

遠興引遊踪遍踏天涯芳草偏愛雙溪好有隱侯舊跡
層樓雲表碧霞丹嶂看縹緲憑欄吟嘯偶佳遇留擣玄

霜歲星旋又過了 歸期誰道無據幾回首興懷坎林
猿鳥今日相看暫得翠尊同倒南翔仍訴幽抱擬待春
空杳與鷓鴣鴻侶共還池島

水調歌頭

和李琳端陽值雨

葵陽閱晴彩榴火濕朱光不知今日何日煙靄漲蒲塘
已過清明時節未近重陽氣候對景自斟量應是家家
雨梅子要催黃 向朝來尋舊事問江鄉共言當此佳
序那肯負年芳雖阻綉茵鬪草不廢翠蕤剪艾更結綵
絲長昌歎縷香玉情味付霞觴

秋水晴霞

即蒹江紅

寫意

客裏光陰那更是厭厭春雨有如許露帷濕幔洒窗飄
戶十日曉寒添故絮一天暮色淒平楚待詩新晴何處倚
吟肩東樓住 芳草際煙橫渚修竹外花連鴈便重整
酒壺茶具詩豪琴譜狂似次公從更醉豪如謝樣休誇
舞有情懷只好共漁樵為賓主

蝶戀花

寫懷

塵路風花暖空晴絮遊絲賸有縈牽處客懷幸自不禁
愁啼鴉又憑德催歸去 細草春沙垂楊古渡忘機何得
如鷗鷺平湖却也慰人心片帆不礙烟中樹

一江春水

顧氏隱居

黃花翠竹臨溪處。正是幽人住。不嫌拄杖破蒼苔。便道
有時煙雨也須來。隔簾塵土紛紛起。久厭襄陽市。若
能招我作西隣。從此一溪流水兩家分。

又

鄭氏隱居

白雲紅樹秋山下。一片江南畫。門前流水帶晴沙。更是
繞籬寒菊正開花。如何眼底逢佳處。偏許幽人住。也
須來此置茅茨。莫待有人相寄草堂資。

沁園春

春霽

昨夜園林纔聽雨。鉤簾滿眼晴色濃。靄旋消淡風微颺。
軟絮柔絲輕織。乍翻暖翼。傍簷新燕。低無力。遍徙倚池

上畫闌。雲影亂。澄碧。謾道逝水飛塵。相將九十韶光。
誰解分得。況千金清宵一刻。花月香色。兩相宜。客裏倦
懷時。自適幾許吟嘯。才情更付遊人。醉邊芳草舊時南
陌。

如夢令

惜春

一日尋芳一度。一樹繁花一步。回首又何時。流水亂紅
無數。春暮春暮。幽草綠陰庭戶。

又

雪景便面

滿眼落花飛絮。回首瓊林玉樹。驢背是何人。得了灞橋
詩句。歸去歸去。春在醉鄉深處。

江月令

春館書事

向暖漸生慵思尋春似減情
快酒懷詩興總濼濼只有
看山不厭薄晚正須憑檻
新晴鎮日鉤簾幾多濃翠
曉來添說與白雲休占

浣溪沙

答平遠翁送金桃

一夜東風落絳葩幾番濃
露染丹砂熟來風味似仙家
摘處芳香沾玉筍破時顏色勝金芽
小兒三採不須

誇

青山相送迎

訪光福王之常煙水居

煙蒼蒼水茫茫閑訪幽人山水鄉
扁舟孤興長蒲舍霜柳含霜蒲柳
蕭蕭青又黃水雲鷗鷺藏

聯芳詞

有引

青陽肇令淑氣載新萬卉未芳梅先應候繼梅
而艷惟杏能之梅杏聯芳春物滋麗韶華九十
二卉開端杏雖晚生見梅之清潔知加敬故度
夷則商一曲以美之曲曰品令梅亦愛杏之麗
因答以夾鍾商之曲曰迎春樂春見二卉交懽
不能自默亦度林鍾羽一曲以嘉賞焉曲曰解
語花夫梅杏皆以色事春者乃能不妬忌而皆
愛敬贊美如此可謂賢矣既賢之其詞不可不
錄故錄之錄之者緱嶺仙人之裔不知其名

稱之楮園叟云

品字令

飛瓊環佩在縹緲香雲影裏水絲瑩霞綃帔瑤階玉
砌雪月看初霽不奈妖妍相嫵媚任天然風致綽約
仙姿真絕世衆芳無地先得春風意右品字令

迎春樂

裁霞剪雪芳枝艷正徵微醉潮丹臉露華濃洗淨殘煙染
更不用閑妝點碎錦穠香空復念臨曉鏡碧波微灩
無那似嬌嬈算只有春能占右迎春樂

解語花

寒消雪點暖弄煙絲又去年時候蕙芽初透輕漸盡感
覺翠波風皺淺黃暈柳微隱映瑤孤芳秀最愛他纖指

輕輕折暗香盈袖艷質固應低首却休慙穠麗不似
清瘦也還知否可人處飛燕玉環都有羅浮夢後更莫
問前村沽酒但好嬌教賦賦白嬌紅鎮年年如舊右解語花

戊申四月十七日 藝風校

錢塘何夢華本

石門先生樂府近體

新喻梁寅

晝夜樂

懷金陵

秣陵猶憶豪華地
醉春風花明媚
碧城綵綯樓臺紫陌
香生羅綺夾十里
秦淮笙歌市酒帘
高曳紅搖翠油碧
小輕車間雕鞍金轡
同遊放浪多才子
詫酣歌如高
李傲時江海狂
心懷古虹蜺雄氣
歸卧雲廬滿鬢十年
間多少愁思春夢繞
度煙波千里

燭影搖紅

後漢匈奴傳言呼韓邪單于來朝願為漢壻後
宮王嬙以積怨自請行此事之實也西京雜記
乃云元帝使畫工毛延壽圖宮人形貌按圖召
幸王嬙以賂金少畫不及貌王嬙當行帝見之

悔乃殺延壽夫元帝柔仁之主也而謂其因女
色殺畫工余固不信而無寵自請行誠一污賤
女子身後之為昭君曲者多歸咎元帝殊不當
也因此賦

深鎖宮花繡生魚鑰重門閉美人何事怨東風獨抱傷
春意月照黃沙萬里到氈城芳心自喜樽前歌舞馬上
琵琶寵深誰比 毳服胡妝那思舊日嬌羅綺年年秋
鴈向南飛肯寄相思字歲久玉顏憔悴似花落悔隨流
水草青墳上應是香魂尚含秋思

木蘭花慢 桃源

愛山中日月春漸去又還來望水繞人家雲生牕戶岫
轉峰迴均層層絳桃千樹似丹霞散綺映樓臺世上從

教桑海人間自有蓬萊 漁郎未必是仙才偶爾到天
台喜相問相邀山中穀篔樹裏樽壘緣何便尋歸路是
風波險處未心灰要似秦民深隱桃花只好移栽

綺羅香 天台

翠谷吞霞丹崖隱日瑤草綠迷仙路複宇層臺雞犬不
知何處花對發洞裏嬌娥璧雙美人間才子信奇緣水
合雲交香風滿徑共歸去 嘈嘈鸞鳳簫管九醞瓊漿
碧冰盤麟脯滄海深深將比此情難侶奈塵臆未斷愁
根被啼鳥苦催歸思嘆多少樂極生悲落花思故樹

八聲甘州

贈易自然禱雨有應

喜神龍飛雨遍秋郊黃河自天來是蟠溪逸士胸中造
化掌上雲雷壇峙陰峰東畔稽首望仙臺絳節霓衣擁

閭闔朝開 憑仗小心風送綠章上奏咫尺瑤階念魚
頭赤子濺濺困炎埃賴皇穹恩波滂沛使千村萬落總
春回人都道先生功行山嶽崔嵬

阮郎歸 自洪家還

歸來長嘯碧山阿結茅牽翠蘿衰顏借問近如何吳霜
侵鬢多 衣短褐卧行窩眼前隨分過一溪風月與煙
波閑中宜釣蓑

醉落魄

蒼厓翠谷閑雲一片無拍束田廬村巷經行熟無取無
求曳杖看修竹 道人邀我巖居宿小槽白酒過醺醪
醉來共唱山中曲無價清歡何必論金玉

南歌子

或以山葡萄為獻其味與家園者無異

此蔓懸秋露驪珠撼曉風丹崖點漆變殷紅味與涼州
珍貢却相同 御苑堪移植雕盤合上供猿猴餘顆寂
寥中多謝樵人分送到山翁

憶秦娥

為南溪廖氏題古梅

湖山曲山頭花照湖波綠湖波綠盈盈仙子鏡中顏玉
百千年樹繁英簇春光却在幽人屋幽人屋自然富
貴海珠千斛

魚遊春水

避亂還家見桃盛開

家隣千峰翠幽徑重開荆棘裏小桃花艷春日盈盈霞
綺香入騷人碧玉杯色映遊女青螺髻帶露更嬌迎風
大媚 古有牆東避世況似武陵風光美時時獨酌花
間別有天地不教掃逕看尤好意欲尋仙從茲始巖前

白雲石邊流水

謝池春 花朝

薄寒山谷閣當亭午瀟瀟雨鳥靜桃花林水生蘭苕渚
玉勒驄稀出油壁車何處欲簪花簪不住花紅髮白應
笑人憔悴春過一半東去水難西駐前半傷多病後
半休虛負白醴醕飽尊滿紫笋山穀具心無累皆佳趣
自辭觴酌勸客須當醉

緱山月 雨夕

急雨響巖阿陰雲暗薜蘿山中春去更寒多縱柴門不
閉花滿逕蒼苔潤少人過蘭舟曾記蘭汀宿牽恨是
煙波而今林下和樵歌看風風雨雨從造物時時變總
心和

玉蝴蝶 閑居

天付林塘幽趣千章雲木三逕風篁雖道老來知足也
有難忘旋移梅要教當戶新插柳須使依牆更論量求
田種秫闢圃栽桑荒涼貧家有誰能顧獨憐巢燕肯
戀茅堂客到衡門且留煮茗對焚香看如今蒼頭白髮
又怎稱紫綬金章大癡狂人嘲我拙我笑人忙

破陣子

黯黯萋萋草色狼狼籍籍花枝江上煙波天共遠樹外
雲山路更迷故人音信稀因病從教癡酒非愁自懶
題詩芍藥荼蘼開漸近蹴鞠鞦韆樂有誰雨偏風慙時

人月圓 春夜

三春月勝三秋月花下惜清陰錦圍綉陣香生革履光

動蘭襟 棠梨枝顫乍驚棲鵲夜久寒侵明朝風雨休
辜此夕一刻千金

燕歸懷 上巳雨

花遲蕭條恰桃霞已盡梨雪初飄雲霧嗔麗景風雨妒
佳朝山中行樂本寥寥那更值年荒酒價高諸生共高
詠只閑靜勝嬉遊 千嶂遠暝故人遠寧妨馬水平橋
象筵寶瑟何由見與誰共羽觴浮蘭亭遺跡長蓬蒿怎
能勾山陰棹小舟對景度新曲獨堪向故人求

雨霖鈴 夏景

螺峯堆綠夜來經雨渾似膏沐飛泉怒瀉崖谷懸霜練
鳴蒼玉虎跡巖前過處踏破翠苔褥聽啼鳥山北山南
樹杪殘雲自相逐 蓬門晝掩稀來躡稱幽人獨步看

竹移床松下零露三四點乍沾湘軸日永如年況是
閑身不受拘束休妄想鷓鴣朝班聊且伴麋鹿

金菊對芙蓉 秋思

玉刻奇峯藍拖秀水秋光渾似耶溪渺蒼烟十里白鳥
孤飛恨無越女芙蓉艷蘭舟小桂棹輕移西風殘照樵
人漁子結伴尤宜 無奈物理難齊歎魚鰕苦瘦鴈鷺
多肥望茫茫江海今更何之溪頭綠樹親曾種耐寒暑
應笑人衰青山千仞白雲萬頃須理荷衣

玉蝴蝶 丙午元夕

霽景烟霞五色黃金柳裊碧玉桃開是春再觀昇平氣
象處處春回且追隨村歌里巷休耽戀綺席樓臺獨徘徊
人看月上月趁人來 因懷金陵舊曾遊翫御街燈

火遠照秦淮友勝同歡醉聽簫鼓鬧春雷幾年間風馳
雲往千里外水複山迴是仙才。飈輪許重訪蓬萊。

訴衷情

李花當戶間桃花妍景雪兼霞春風送將春色照耀野
人家。回蝶使罷蜂衙日初斜雙鶯窻外雙燕簾間共
惜穠華

浪淘沙 夜雨

簷溜瀉泉聲寒透疎櫺愁如百草雨中生誰信在家翻
似客好夢先驚。花發恐飄零只待朝晴彩霞日照山庭
曾約故人應到也同聽啼鶯

採桑子 孟夏

舍南舍北多桃李子滿青枝曲逕冥迷新竹增高舊竹

低。掃苔坐石何妨久行步常遲竚立移時雲起東風
日墜西

宴清都 端午

帶恨湘江水無奈遠楚雲天際千里靈均一去芳蓀翠
減香薜青死龍舟鼉鼓聲沸歎舊俗空誇水戲樂少年
越女吳姬王孫公子。曾記南浦芙蓉東湖楊柳斜日
歌吹綵舟載酒綸巾揮扇勝友同醉而今白頭蓬卷但
諳慣獨醒滋味好只把蘭佩荷衣從今料理

望江南 傍村之民兄弟四人坐豪奪民產遠流

山深處豺虎縱跳跟但愛體肥貪肉食那知腹飽是身
殃天網甚恢張。千里外魑魅可同鄉三尺正當嚴律
令四凶那得詫強梁稽首謝君王

天仙子 苦熱

六合似鑪雲似火熱氣蒸肌煙霧鎖此時那得羽翰生
冰壑過風巖坐瀑布濺衣珠萬顆未早先愁愁怎躲
如在顛崖唯恐墮急須霖雨慰蒼生名譽播江之左誰
在東山深處卧

蘇幕遮 秋旱喜雨

白蘋乾紅蓼悴日減溪流塵擁渾如霧一日雲凝千嶂
雨黃葉蕭蕭却又添新翠墾蒿煙耕草露種麥栽松
生計那嫌暮預想登高歡會阻門掩黃花也自多幽趣

永遇樂

丙午歲仲秋與胡中山同舟往南昌至樟鎮而返別逾一月作此寄之中山能談秦

年少羨君有如瓊樹相見何晚虎瞰山前輕船同載正

桂花香滿封溪一夕孤蓬聽浪又趁朔風迤返計經藏
只堪一笑怕令白鷗驚見君如管輅聰明負異能道
山翁奇蹇絳闕蓬萊人間天上翹首仙凡遠何時訪我
竹溪松壑儘有白雲堪翫寫長懷且寄南飛秋雁

浣溪沙 冬景

錦樹分明上苑花晴光宜日又宜霞碧烟橫處有人家
綠似鴨頭松下水白於魚腹柳邊沙一溪雲影鴈飛
斜

洞仙歌 舍後山中見羣鹿

菰峯碧峭長雲中瑤草羣鹿甦甦怪怪希有想嵩陽少室
曾伴松喬知踏遍白石蒼苔多少逸人塵外趣翳鳳
驟鸞夢上瀛洲歷蓬島暮見爾此山中便對煙霞喜共

約長為儕友為借問仙翁在何方願同往從之徧窺巖
岫

木蘭花慢

賀彭子壽伯頃叔姪新居

美樓臺有地不改換舊林塘想叔父東山郎君玉樹籌
畫非常雲霄正期勲業且先恢庭戶攬風光蒼靄畫生
翠牖丹霞曉映雕梁春鶯求友候春陽應戀木千章
宜永日圖書涼飈絲竹皓月壺觴蓬萊宛然異境愛琪
花瑶草近人香老矣猶誇能賦憶君夢到夢堂

真珠簾

丙午冬雪

西窗夢斷簷光曉雪交墜山僮驚報巖岫化銀宮似白
雲仙島萬樹梨花都開遍怪一夜春風來早凝眺想千
家晏起村巷幽悄誰解喚掃庭除命雕鞍迎客玉壺

注酒金帳擁紅妝惜盛歡難久何似袁安門晝掩抱清
冷年年如舊須候候暖日烘梅竹梅松回秀

折桂令

留京城作

龍樓鳳閣重重海上蓬萊天上瑤宮錦綉才人風雲奇
士袞袞相逢幾人侍黃金殿上幾人在紫陌塵中運
有窮通寬著心胸一任君王一任天公

踏沙行

江上阻風

疊浪堆瓊橫煙織素停橈避險灣頭住汀洲連水水連
雲何曾迷却歸人路今夕聊淹明朝須去休愁休怨
休嗔怒還家正屬好風光啼鶯無數花枝千樹

虞美人

舟中

岷峨雪盡生春水江濶盤蛟喜蘭橈曉發大江東回望

銀宮金闕五雲中 來時秋渚蒹葭老 歸日春花早
客身千里似征鴻 恰恰秋來春去總相同

謁金門

舟中對月

天似洗 遙望楚山千里 歸鴈數聲雲外去 此身猶滯此
半夜潛蛟不起 潭月金鱗光細 獨倚孤蓬 渾不寐 碧
流清見底

謁金門

采石花朝

春正美 處處艷桃穠 李記省花晨 今日是 奈何辭帝里
采石蘭橈暫倚 且與舟人同醉 心已到家身尚未 客
中聊復爾

臨江仙

舟中

十日江程春過半 渚青新長 蘆芽李花幾樹 間桃花嫩

黃烟際柳 遠白水邊沙 老子老來心似水 肯教愁緒
如麻 扁舟來往似仙槎 還家今有日 那得更思家

菩薩蠻

湖口

海門西上帆如電 神靈借與天 風便容易見 廬山雲中
雙鶴還 風勻波不怒 水碧涵山翠 沽酒酌神君 醉吟
湖上春

金縷衣

泊南浦

南浦歸帆暮 喜重看螺江 煙柳鶴汀 雲樹畫棟 珠簾歌
舞地 風景已非前度 只浩蕩江濤如故 相望飛樓鵬翅
展 羨雄城防衛多 貌虎又喜免亂離 苦 舊時猶記登
臨處 共詩朋賦友 同歡詠 今懷古 兩鬢星星 今老矣 却
似荼蘼 孤注歎桃李 不知春去 獨有洪崖青不改 似於

人戀戀能相顧招我隱有佳趣

八聲甘州

近里有妄男子為妻所詬遂忿而遠去誓云非
富貴不歸妻亦誓獨守無他志既歷十五年夫
竟旅困羞歸而妻能潔身以自守獨理其家衣
食饒給因咏以勵薄俗

記年時波蕩兩鴛鴦雌雄各分流恨郎情似水妾心如
石此恨難休自古恩深蒼滄海富貴等浮漚何忍輕離
別反愛為仇君看江頭枯樹縱春風虛過根幹仍留
且牽蘿空谷蓬戶自綢繆想秋胡未忘故態怕無金相
贈却懷羞歸來日郎嗔妾忿都合冰消霧收

清閨閣樂府

梁溪倪瓚

小桃紅

陸莊風景又蕭條堪歎還堪笑世事茫茫更誰料訪漁
樵後庭玉樹當時調可憐商女不知亡國吹向紫鸞
簫

一江秋水淡寒煙水影明如練眼底離愁數行雁寫晴

天一作白一作蘋紅蓼羞參見吳歌蕩槳一聲哀怨驚起

鷺鷥眠

五湖煙水未歸身天地雙蓬鬢白酒新葛會隣近主酬
賓百年世事興亡運青山數家漁舟一葉聊且避風
塵

踏莎行

春渚芹蒲秋郊梨棗西風沃野收紅稻簷前炙背媚晴
陽天涯轉瞬淒芳草魯望漁邨陶朱煙島高風峻節
如今掃黃雞啄黍濁醪香開門迎笑東隣老

鷓鴣天

笠澤沿洄十五年親知情義日堪憐偷兒三顧吾何有
俗士羣譏自省愆聊復爾豈其然田翁輕慢牧童顛
乃知造物深相與急使江湖棹去船

江城子

滿城風雨近重陽溼秋光暗橫塘蕭瑟汀蒲岸柳送淒
涼親舊登高前日夢松菊徑也應荒堪將何物比愁
長綠泱泱遶秋江流到天涯盤屈九回腸烟外青蘋飛
白鳥歸路阻思微茫

蝶戀花

夜永愁人偏起早容鬢蕭蕭鏡裏看枯槁雨葉鋪庭風
為掃閒門寂寞生秋草行路難行悲遠道說着客行
真箇令人惱久客還家貧亦好無家謾自傷懷抱

清平樂

在荆溪作

汀煙溪樹總是傷心處望斷溪流東北注夢逐孤雲歸
去山花野鳥初春漁郎樵叟南津誰識摧頽老子醉
人推罵從嗔

凭欄人

贈吳國良

客有吳郎吹洞簫明月沈江春霧曉湘靈不可招水雲
中環珮搖

人月圓

傷心莫問前朝事重上越王臺鷓鴣啼處東風草綠殘
照花開 悵然孤嘯青山故國喬木蒼苔當時明月依
依素影何處飛來

驚回一枕當年夢漁唱起南津畫屏雲嶂池塘春草無
限消魂 舊家應在梧桐覆井楊柳藏門閒身空老孤
篷聽雨燈火江村

太常引

傷逝

門前楊柳密藏鴉春事到桐華敲火試新茶想月珮雲
衣故家 苔生雨館凝塵錦瑟寂寞聽鳴哇芳草際天
涯喋^蝶相春暉夢華

殿前歡

搵啼紅杏花消息雨聲中十年一覺揚州夢春水如空

雁波寒寫去踪離愁重南浦行雲送冰弦玉柱彈怨
東風

水仙子

東風花外小紅樓南浦山橫眉黛愁春寒不管花枝瘦
無情水自流 簷前燕語嬌柔驚回幽夢難尋舊遊落
日簾鉤

吹簫聲斷更登樓獨自凭欄獨自愁斜陽綠慘紅消瘦
長江天際流 百般嬌千種溫柔金縷曲新聲低按碧
油車名園共遊絳綃裙羅襪如鉤

折桂令

擬張鳴善

草茫茫秦漢陵闕世代興亡却便似月影圓缺山人家
堆案圖書當牕松桂滿地薇蕨 侯門深何須刺謁白

雲間自可怡悅到如今世事難說天地間不見一箇英雄不見一箇豪傑

又 辛亥過陸莊

片帆輕水遠山長鴻雁將來菊蕊初黃碧海鯨鯢蘭若
翡翠風露鴛鴦問音信何人諦當想情懷舊日風光
楊柳池塘隨處凋零無限思量

水仙子

因觀花間集作

香腮玉膩鬢蟬輕翡翠釵梁碧燕橫新妝懶步紅芳徑
小重山雲一作空畫屏繡簾風暖春醒烟草粘飛絮蛛
絲罥落英無限傷情

江城子

感舊

牕前翠影溼芭蕉雨瀟瀟思無聊夢入故鄉一作園山水碧

迢迢依舊當年行樂地香徑杳綠苔饒沉香火底坐
吹簫憶妖嬈想風標同步芙蓉花畔赤欄橋漁唱一聲
驚夢覺無覓處不堪招

柳梢青

贈妓小瑤英

樓上玉笙吹徹白露冷飛璫珮玦黛淺含顰香殘棲夢
子規啼月揚州往事荒涼有多少愁縈思結燕語空
梁鷗盟寒渚畫闌飄雪

南鄉子

東林橋雨篷夢歸

篷上雨潺潺篷底幽人夢故山礧戶林扉元不閉蕭閒
只有飛雲可往還波冷玉珊珊一壑松風引珮環咏
得池塘春草句更闌行盡千峰半雲間

太常引

壽彝齋

柳陰濯足水浸磯香度野薔薇芳草綠萋萋問何事王
孫未歸一壺濁酒一聲清唱簾幙燕雙飛風暖試輕
衣介眉壽遙瞻翠微

鵲橋仙

富豪休恃英雄休使一旦繁華如洗鵲巢何事借鳩居
數載主三易矣東家烟起西家烟起無復碧暈朱啟
我來重宿半間雲舊製唯餘此耳

憶秦娥

昨日嘗賦憶秦娥一首以介石齋前木樨盛開
俾其一厄酒無使花神笑人寂寞蓋以風雨傷
懷耳茲重改呈又作一首共
寫呈二君却不可默默也

扶疎玉蟾宮樹影闌干曲闌干曲一襟香露幾枝金粟
姮娥鏡裏秋雲綠無端風雨聲相續聲相續不須澄

霽為醅醅醅

參差玉笙聲莫起瑤臺曲瑤臺曲輕風香浸夜涼金粟
黃雲巧綴飛霞綠清吟未斷秋霖續秋霖續恐孤花
意倒尊中醅

如夢令

削跡松陵華寓藏密白雲深處造物已安排萬事何
須先慮歸去歸去海鶴山猿同住

光緒戊申三月鈔 荃孫



大清宣統元年正月

大清宣統元年正月

大清宣統元年正月

大清宣統元年正月





